

Date – 09/12/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

- Chief Minister Pu Lalduhoma'n hna thawk tura chhawr tlak tawh loh leh thawk thei tawh lo sorkar hnathawk te chu nuamsa zawka an awm theih nan 'Special Pension Scheme' hmanga chawl mai turin an duh tih a sawi.
- TB Campaign runpui - 100 Days Campaign chu vawiin khan Minister Pu B. Lalchhanzovan a hawng.
- Ngaihna thiamna tel loa lirthei endik runpui 'No Tolerance Week 2024' chu vawiin atang khan Mizoram hmun hrang hrangah kalpui tan a ni .
- Vawiin Parliament in hnih rorel inkhawm chu chhan hrang hrang avanga rorel theihlova chawlh lailawk hnuah rorel hleithei lovin vawiin atan tihtawp a ni.

<><><>

### CM - POLICE MEET

Chief Minister Pu Lalduhoma'n hna thawk tura chhawr tlak tawh loh leh thawk thei tawh lo sorkar hnathawk te chu nuamsa zawka an awm theih nan 'Special Pension Scheme' hmanga chawl mai turin an duh tih a sawi.

Mizoram Police Sports Meet vawi 22-na 1st Bn MAP Football Ground, Armed Venga neih a hmanpui naah he thu hi sawiin Pu Lalduhawma chuan Sawrkar ina a chhawr a hnathawkte chu eiral tur chauh nilo in chhawr tlaka awm turin a chah a, thawk thei tawhlo te chu Special Pension Scheme hmanga chawl mai turin a ngen tih a sawi.

Chief Minister chuan ruihhlo do kawngah Police te chu thlem theihin an awm tur anilo a ti a, hetianga fihlim lo te chu hremna an pumpelh dawn lo a ti a, ruihhlo do kawngah sawrkar tha a thlah dawnlo tih sawiin a tawiam turin mi tin an pawimawh tih a sawi bawk.

Chief Minister chuan Police hna chu taksa leh rilru hrisel tak nei chungawh ngai a nih sawiin, uluk taka invawng chungawh thawkte chuan malsawmna an dawng thin a ti a, ram changkangah chuan police-te chu an zahin an ngaisang thin tih sawiin, an ngaihsan chhan chu entawn tlak a an nun vang leh khawtlang chhanhim tura an hnathawh that vang te a ni a ti a. Mizoramah police thawk lai thi an tam thin tih sawiin, an thih chhan chu nunphung kaihhawih a ni deuh zel a, hriselna mamawh tak department berah hrisel loh vanga vanglaia boral an tam chuan ngaihtuah a ti thui tih a sawi bawk.

Mizoram Police Sports Meet hi tun hma chuan mawhpurtu bik awm loin an nei mai thin a, kum 2002 ah khan Mizoram State Sports Control Board din niin, anni hian an kaihruai ta thin a ni. Kumin Police Sports Meet hi vawiin atanga December 13, Zirtawpni thleng neih tur a ni ang.

<><><>

### GOVERNOR DONATES

Armed Forces Flag Day, puala vehbur khawn kaltlangin vawiin khan Mizoram Larsap Dr. Hari Babu Kambhampati chuan Armed Forces Flag Day Fund (AFFDF) atan tanpuina sumfai a thawh.

Dr. Hari Babu Kambhampati hian Armed Forces Flag Day puala vehbur khawntu Directorate of Sainik Welfare & Resettlement hotute hi lawm taka lo dawngsawngin sipai leh an chhungte zinga chhawmdawl ngaite pualin tanpuina sumfai a lo hlan a ni.

Kar kalta Inrinni kha Armed Forces Flag Day niin hemi pual hian Sawrkar hotulu leh Pisa hrang hrangte chuan tanpuina sumfai an hlan bakah hemi puala sum tuakna flag day material zawrhte an leisak a. Hetih hun lai hian Mizoram Governor hi State pawna a zin chhuah lai a ni a, remchan zawkna avangin tanpuina sumfai hi vawiin lamah a hlan ta zawk a ni.

<><><>

EDU MINISTER

Education Minister Dr. Vanlalhlana chuan, thiamna leh zir binga lama thleng sang turin chhiarkawp thiam a pawimawh tih a sawi.

Vawiin khan Pachhunga University College-a Department of Mathematics chuan Mathematical Olympiad Exposure Camp an buatsaih a, he huna kuallian Dr. Vanlalhlana chuan Mathematics thiam a pawimawhzia sawiin, ngaihtuahna tihriamtu a nih thu a sawi a. Engineering, Science, Commerce leh Economics lamah pawh Mathematics Zirna chhonzawm turin Mathematics thiam a ngai tel tih a sawi. School Education Minister chuan PUC hi he Camp pawimawh tak a buatsaih chu tha a tih thu sawiin Camp neih atangin Zirlai ten Mathematics ah phurna thar an neih ngei a beisei thu a sawi bawh.

Mathematical Olympiad Exposure Camp-ah hian sikul hrang hrang 16 atangin pawl 9, 10 leh 11 zirlai 90 lai an tel a. He camp hi Mizo naupang ten Mathematics zirnaah hma an sawn theih nan leh state dangte ruala ke an pen ve theihna atana ruahman a ni a. National level leh international level Mathematics Olympiad-ah Mizo naupang an tel tam theih nan buatsaih a ni tih Prof LP Lalduhawma Head Department of Applied Mathematics and Statistics chuan a sawi.

Olympiad Exam Center hi Mizoramah neih ve ngei tura hmalak mek a ni.

<><><>

SHIV MANDIR CENTENARY

Kolasib Hmarveng a Gorkha te pathian biak in, Shiv Mandir kum 100 tlin lawmna kalpui mek chu zanin hian a tiak dawn.

He Shiv Mandir hi kum 1924 ah khatih hun laia Kolasib Hmarveng a cheng Gorkha hnam awm chhun ten an din a, a tirah chuan biak In ang chiah a hmang lovin an pathian tana in serh hranna hmun angah an ngai a, hun alo lokal zel a, tunah chuan biak In tha leh ropui tak niin RCC building in sak ani ta ani.

Shiv Mandir Centenary lawmna hi tun thla ni 7 atang khan tan in, nimin nileng a hun an hman hnuah a lawmna ni hnukung ber vawiin nileng khan

hun an hman a, chawhnu khan Speaker Pi Param Puja Sadhivi Gopika leh a hruihruai, Brindadam Dham, Uttar Pradesh atanga lokal ten pathian fakna hla sa in, an Speaker hnen atangin sermon an ngaithla a ni.

<><><>

## TB CAMPAIGN

TB Campaign runpui - 100 Days Campaign chu vawiin khan Food, Civil Supplies & Consumer Affairs Minister Pu B. Lalchhanzovan a hawng.

Directorate of Hospital and Medical Education Auditorium, MINECO Khatla-a hun hmanah Pu B. Lalchhanzova chuan, TB Campaign a hlawhtlin theih nan chuan sorkar department hrang hrang bakah kohhran, tlawmngaipawl leh khawtlang tanrual a pawimawh dawn hle tih a sawi.

Supply Minister chuan, sorkar hmalakna apiangah mipuite chu dah pawimawh ber tur an nih thu sawiin, district thlan chhuah bika TB dona atana hmalaknate chu mipuite'n a tangkai thei ang berin hman se a duh thu a tarlang a. Mizoram chu ram ralmuang tak ni mah se, hriselna kawngah erawh kan him loh thu leh ralmuang taka awm mai mai thei kan nih loh thu a sawi baw a. TB dona atan mipuite chu rawn pen chhuaka, sawrkar hmalaknahte inpekna tak tak nena thawhhopui turin a sawm nghal baw a ni.

Health Dept Secretary Pi Sangchin Chinzah chuan 100 Days Campaign hawna hi a kaihruai a, kum 2025 a India ram atanga TB umbo tura Ministry of H&FW hmalaknate a sawi zau nghal baw a. TB damlo chhawmdawl na pe tha zualte hnena chawimawina certificate hlan.

TB programme performance tarlan danin kumin January atanga December ni 9 thleng hian TB rinhlelh mi 24,017 test tawh zingah, TB vei mi 2,164 hmuhchhuah niin, TB vei inenkawl lai mi 147 an thi a. TB vei tihdam leh zat chu za zela 80% a ni.

100 Days Campaign hawna hun hi State level bakah, Aizawl, Champhai, Mamit leh Serchhip District-ah te pawh neih vek tura ruahman a ni.

<><><>

## NO TOLERANCE WEEK

Ngaihna thiamna tel loa lirthei endik runpui 'No Tolerance Week 2024' chu vawiin atang khan Mizoram hmun hrang hrangah hman tan a ni a, Aizawlah chuan Bara Bazarah lirthei endik a ni.

Akashvani Correspondent zawhna chhangin, Aizawl Traffic SP Pu Stephen Lalrinawma chuan, Aizawl khawpui chhungah lirthei endik a ni tih a sawi a, krismas bazar hun lai nen a in nan bakah traffic tih jam nasat palh theih a nih avangin vawiinah chuan hmun khatah chauh endikna hmun an siam tih a sawi a, a tul chuan hmun dangah pawh endikna hmun siam belh a la ni ang, a ti.

Pu Stephen Lalrinawma chuan, Mizoram sorkarin lirthei endik a nih tur thu thuchhuah a siam hma avangin lirthei neitu tam takin an document te an lo ti fel a, lirthei khu endikna hmun pawh a lun in an lo inchingfel tha chu thil lawmawm a nih thu a sawi baw a.

Puan tawh angin Mizoram sorkar chuan 'No Tolerance Week 2024' chungchanghian thla hmasa khan thuchhuah a lo siam tawh. Akashvani Aizawl News in lirthei khu endikna hmun a tlawh kual na ah lirthei khu endik tur an tam thei hle a ni.

Lirthei endik hi kum 2024 Krismas leh kumthar 2025 mitinin dam leh hlimtlang taka an hman theih nana tih a ni a, he hunah hian Driving License neilova lirthei khalh, Insurance Certificate nung loa lirthei khalh, Pollution Under Control Certificate (PUCC) nung lo, mipui leh bungraw phur lirthei Fitness Certificate nei lo te leh lirthei kaihnawih dan bawhchhiatna te endik a ni.

<><><>

## PARLIAMENT SESSION

Vawiin Parliament in hnih rorel inkhawm chu chhan hrang hrang avanga rorel theihlova chawlh lailawk hnuah rorel hleitheih lovin vawiin atan tihtawp a ni a.

Loksabha rorel inkhawm achu vawi 3 lai tihtawp lailawk a ni a. Opposition party congress, DMK leh party dangte chuan sumdawng lian te hnen a thamna pek chungchang an au chhuahpui leh bawk thawm beng chheng nasa tak kar ah hian railway minister Ashwini Vaishnaw chuan Railway Amendment Bill 2024 chungchang chu chhan na pek a tum ve bawk a, Presiding officer chuan House rorelna chu tha tak a neih anih theihna tur in bengchheng siam lo tur a ngen mahse hei hian awmzia a nei thui lo hle. Speaker Om birla cuan question hour chu a pawimawh thu sawiin question hour chhung chuan thil dang sawi chhuah theih anih loh thu sawiin opposition chu bengchheng siam lo turin a hrilh a ni.

Hetiang bawk hian Rajya Sabha ah pawh bengchheng siamin House leader Jo Nadda cuan Ccongress chu Ram venhimna ti chhetu ah a puh a, ramchhunga inrem loh na leh buaina chawh chhuak tu ah a puh bawk. Congress hruaitu te leh US ah George Soros Foundation and forum of Democratic Leaders in Asia Pacific te inzawmna nia sawi chu a lungawi thlak loh thu a sawi a, treasury lam chuan he thil hi rampum huap nghawng thil a nih a vangin sawiho an duh thu a sawi bawk. Heng puh na te hi opposition leader Mallikarjun Kkcharge chuan BJP chu ram phatsan a British lam tang ah a puh bawk ani.

<><><>